



Il chantun promova la vendita d'animals da niz cun sustegnair activitads da reclama sco er mesiras per distgargar las fieras da muvel.

FOTO J. F. PAJAROLA

Promover vinavant la vendita da muvel

■ (cc) Il chantun promova la vendita d'animals da niz cun sustegnair activitads da reclama sco er mesiras per distgargar las fieras da muvel. La realisaziun da questas mesiras po vegnir surdada ad in'organisaziun agricola. En il Grischun procura la graubündenVieh SA per ina vendita optimala dal muvel. Sco indemnisaziun pauschala survegn ella per quai 106 000 francs per l'onnn current. Per l'organisaziun dals martgads publics da muvel da maz vegn pajada ina contribuziun da basa da 140 000 francs. Vitiers

vegnan contribuziuns per chau per arments, per nursas e per chauras. Ultra da quai vegn il martgà da nursas e da chauras promovì er quest onnn cun ina contribuziun da 6 francs per animal commercialisà. Tar stimads 20 000 animals resulta da quai ina contribuziun totala da 120 000 francs per onnn. Per nursas che vegnan vendidas e transportadas davent en las Vals dal sid vegn pajada ina contribuziun da transport da 4 francs per animal.

La politica agrara federala 2014–

2017 ch'è entrada en vigur il 1. da schaner 2014 e che cuntegna il nov sistem da pajament direct surlascha la tratga d'animals cumplettaimain a las reglas dal martgà liber perquai ch'ils pajaments directs che sa refereschan a l'animal crodan davent. En quest senn conceda il chantun ina contribuziun da 90 000 francs a l'amortisaziun dal center da commercialisaziun da muvel a Cazas. Uschia duain vegnir realisadas cundiziuns generalas favuravlas per la commercialisaziun da muvel en il Grischun.